

Chel Diàol de Pavarin

“N om che no à mai renunzià a pissèr con sie cef” coscità l’è stat definì Tita Piaz de Pavarin, nasciù a Pera del 1879 e mort del 1948. Sun el, sia fegura de alpinist, ma ence de om de cultura e de politica, l’è l video realisà da l’Istitut “majon di fascegn” en coproduzion con Marisa Montibeller Pictures de Trent e che é stat moscià en anteprema assoluta te la verscion ladina en ocajon de la setemèna de la cultura al Museo Ladin de Fascia.


Se trata de n film che dura presciapèch 35 menuc e che conta del più emportant e cognosciù rampeador de Fascia, co l’intenzion de vardèr sorafora l mit alpinistich per tocèr aspec manco cognosciui e zelebré del personaje, tant a nivel culturèl che storich e politich.

Per meter ensema chest filmat l’è stat fat registracions neves sui parees che à vedù Tita Piaz

protagonist, col didament del menacrep Ivo Piaz, e se emprevalan de la testimonianzes prezioses de Modesto Locatin, gran amich de Tita e testamonech de momenc emportanc desche per ejempie l’azident co la roda olache Piaz à perdù la vita.

Amò apede ite per anter i recorç del gran alpinist Tone Valeruz e la ousc de la storica Luciana Palla, che de Piaz l’è aldidanché la biografia più autorevola dal pont de veduda storich e scientific. Recordon l bel liber de Luciana Palla Tita Piaz a confronto con il suo mito” olache la autora prejenta Piaz con eie storich e n muie più critich. Piaz é stat dalbon n gran personaje te Fascia ma el e sia rampinèdes é cognosciudes daperdut, a nivel mondèl.

L’era socialist e anti-fascist, contra la convenzioms de so temp e a soa maniera semper vejìn a la



Tita Piaz de Pavarin.

pera jent. L’è passà fora doi veres e l’è vivù i mudamenc più senestres, dal lurier da bacan a chel leà al turism e l’è stat apontin “desfrutan” i prumes ghesc che ruèa enlouta te Fascia, te chi che l vedea ence na forma de vadagn, che l’è stat bon de fèr cognoscer daperdut sie inom e sia impreses alpinistiches. Tita Piaz l’è stat ombolt e president de la Comunità de Fascia ma l’è abù ence l merit de ge orir l teater a la femenes, ajache fin enlouta per eles l’era descomanà spilenèr sun paladina.

Duta chesta carateristiches del personaje Tita Piaz se pel les veder tel nef video documentèr de l’ICL dal titol “Chel Diàol de Pavarin” che prest vegnarà metù a la leta de la jent e fat veder sui canai naziònei de la televijion, ajache Tita Piaz l’è stat dassen n zitadin de l’Europa. (mci)



L diretor de l’Istitut Ladin Fabio Chiocchetti a la prejentazion del video.